

QUÆSTIO MEDICA,

CARDINALITIIS DISPUTATIONIBUS,
manè discutienda in Scholis Medicorum, die Foris
decimâ-sexâ Junii.

M. JOANNE CORDELLE, Doctore
Medico, Præside.

An potione è theriacâ, à quacunque febre malignâ præcavetur?

I.

TANTAM inter calamitatum segetem, quibus tota fere gallia nuper vexabatur, frequentioribus exemplis quotidie experiebamur, febrem malignam, maximas edere strages, communique furore, totas pervagari Urbes ac provincias; & truculentiâ, malignitatè, periculosoque eventu, omnes sive reges sive inopes terrere. Maligna febris non unius morbi nomen, sed diversa omnium pene est febrium infestissima, aliquando contagiosa, ab eâ nihil induciarum, fraudis vero plurimum, plerumque enim dum clementiæ similitudine blanditur, repente ægros in ipsis quas struit insidiis jugulat, ferocitate exultans, rapit, sternit, latèque vastat: Tamen posito furore sapius ad salutem convertitur, tametsi nec spiritibus, nec humoribus, nec Cordi ipsi parcat. Frequenter facili, sed terro spiritu, urinisque, substantiâ, colore, ac sedimento valentium similibus, interdum & miti calore rudiõribus imponit; pulsu (qui suis ictibus vitæ gubernacula temperat) frequenti, incertoque, minus: minus & ipsis in quibus totus homo est oculis aut micantibus, aut torvis, aut pene extinctis, & cum reliquo vultu squallentibus; his si adsint foetidus sudor, iniquies, vomitus, syncope, dolor capitis, quique alliget artus languor & sopor, aut nares stillent sanguine: vel si absint maligna

2

exanthemata , prodromi ac testes optimi non adumbratam , sed expressam malignæ febris effigiem indicabis ; & statues.

II.

EXTERNÆ internæque causæ ad istam malignitatem excitandam convenient necesse est , quæ foris illabuntur , neque nocente cælo devocandæ tantum , neque à truci Martis spiritu , neque ab arcano influxu , neque ab ignitis cometis nequidem id mali portendentibus , neque à sparsio veneno deducendæ ; sed à fecundissimâ illâ morborum procreatrice aëris iniquioris putredine excellenti : Is sive sit perversâ spirantium ventorum , vel forte unius plumbei aultrî aurâ inquinatus , sive diuturno hyemis tepore , assiduisque imbribus , perniciosè depravatus sit ; sive à sentinis ; cænosisque specubus , disiectisque passim cadaveribus labem acceperit , simul atque per conspicuas , & quæ sensum fugiunt vias infert se in viventium corpora , facile quidquid contraxit vitii comportat , quocunque penetrat , nec tantum omnes quibus triste virus afflat : febre mulctat malignâ , sed eos duntaxat qui jam aliquam ægrotandi causam , suo sinu gerebant , ut nec ab his inficiuntur quicunque exhalatam per corporis labefactati spiramenta tetram mephitim contagione hauerunt , perinde nimirum ut cujus corpus affectum est , ita aut domitum virus exiit , aut ab eo contaminatum ægrotat , variique existunt casus , mores , & eventus morbi ,

III.

INTER homines tanti mali labe promiscue jactari obnoxios , eos potissimum numerabis quibus ex pravo , uberiori , vel male confecto è frugibus , fructibus aut plantis male coctis , aut ab animalibus male sanis , miserè propter rerum inopiam ut nuper contigit , alimento desumptis ; reses impuritas plurima , clam cum ipsis visceribus æstuat ; & quibus tenuiora excrementa tentato per cæcos ductus exitu prohibita , atque in serum acre demutata , toto corpore luxuriantem pollunt sanguinem , qui obsecenioris putredinis labe aspersus ut primum incandescit , flammamque in vitæ arcem jactat , illâ statim correptum corpus universum impuris facibus ardet , miserèque consumitur . Summæ istius putredinis intimæ , quæ nihil aliud est quam succorum à proprio temperamento recessus propè quantus rerum ad ruinam festinantium , tanta est pernities , ut aliquando citra ullam conspur-

cati aëris aspirationem, maligna nascatur febris, pro vario ad quem ascendit gradu durior, aut mitior. Propterea ad eam proclives sunt qui peregrino humore scatent; magisque ubi calorem conduplicat ætas, & prouiores sunt iuvenes, senibus; sanguinei, melancolicis; intemperantes, siccis.

IV.

GRAVITER hallucinantur qui potione ex theriacâ tanquam specifico ac singulari alexipharmaco tanti mali vim eludere, ac declinare contendunt; quasi parum sit venarum tabum manu liberali profunderè, ignisque latentis materiam, ac reliquam illuviem, omni arte detrahere tam diaphoreticis, si à causâ externâ, quam catharticis, si ab internâ; ejusque flammam magnâ temperati potus vi comprimere, ac in ipsis incunabulis suffocare; posterior ætas quo ingeniosius hominum saluti prospicere videretur, nobilior operosiusque servaret *oppositior*, adhibuit etiam aurum, uniones, saphiros, smaragdos, aliosque lapides preciosos. Admovit & animalium saniem, vomicam, calculos, cornua, dentes, strigmenta, maris ejectiones, ipsam quam calcamus terram, quin progressâ longius fero morbo, ipsa venenata animalia, Bufones, Araneas etiam ex collo tanquam ad ostentationem pendencia, opposuit. Tot inter merces ex his luxuriosè conflatas, splendidi nominis confectiones innumeras, quibus morbi appropinquatione trepidis, suæque omnia ut vivant incolumes daturis, credulis illudunt vafri, sedet quasi princeps & regina theriaca eorum ex quibus coaluit numero, pompâ, atque apparatu percelebris.

V.

HARUM itaque febrium malignarum in quibus spiritus non tantum, sed etiam humores & partes dicam omnes quasi incendio, sulphuris exaltatione deflagrare videntur, dum latet adhuc ignis sub cinere doloso, strages avertere cupienti, potum è theriacâ si objicias, latebit sancita à medicorum phœbo lex quâ morbum quemque jubet oppugnare præsidii omni qualitate ipsi adversâ ornatis. Strues est medicamentorum calidorum, siccorum, acrium, stirpium, seu petitarum undelibet aliarum rerum plurimo sale coque volatili multo, refertarum, quæ totidem quasi incentivis hominem inter medios ignes versantem comburet, febrisque causam ut furenter efferatur, magis ac

magis instigabit, nullumque cordi robur addit, immo spiritus dissolvit. Ea tantum hominem servabunt sanum & à quacunque febre malignâ vindicabunt, quæ ipsius laudabilem temperiem cum justâ spirituum copiâ, ac debitâ partium structurâ, conservare apta nata sunt, ac facile & cito in sanguinem abeunt laudabilem; ut sunt alimenta εὔχυμα ἔ πολύτροφα, è jusculis è carnibus tenellis, avium, & quadrupedum quorundam in his provinciis familiarium. Nec displicet potionum usus quæ levi aciditate temperatæ, morbi causæ vim frangunt, ut nobis per belle se se offerunt in succis limonum, granatorum, berberis, oxycantæ, oxalidis, melissæ, vitis, arantiorum, aliorumque quamplurimorum, è plantis aut fructibus feliciter expressis, qui putredinis lui, non mediocriter valentium delectatione adversantur, & latentibus igniculis qui mox febrem malignam perniciosam usu potionis è theriacâ accenderent, subveniunt, & extinguunt, & cor quasi maceratum recreant; sicque servatâ vivendi rectâ ratione & alimentorum, robori caloris nativi proportionem, hominem servabis ὀρθότατος, à cujusque febris malignæ metu cautum, quantum in viro prudenti erit, ac securum.

Ergo potione è theriacâ, à quacunque febre malignâ non præcavetur.

Proponebat Parisiis ARMANDUS JOSEPHUS COLLOT,
Parisiensis, Baccalaureus Medicus. A. R. S. H. 1695.

Apud Franciscum Muguët, Regis & Facultatis Medicinæ Typographum.